

Málsnr.: 216030085
Skjalasafn Ráðhúss
14. mars 2016
Bréfalykill: 6250-0

SAMÞYKKT
um meðhöndlun úrgangs í Reykjavíkurborg.

1. gr.
Markmiðsákvæði

Markmið samþykktar þessarar er að stuðla að því að meðhöndlun úrgangs valdi sem minnstum óæskilegum áhrifum á umhverfið, stuðla að endurnotkun og endurnýtingu, tryggja vinnuvernd starfsfólks og góða þjónustu við íbúa. Horft verður til úrgangspríhymingsins í meðhöndlun úrgangs í Reykjavík, áhersla lögð á úrgangsförvarnir og mengunarbótareglan höfð að leiðarljósi við ákvörðun gjaldtöku vegna meðhöndlunar úrgangs.

2. gr.
Almenn ákvæði

Meðhöndlun úrgangs í Reykjavíkurborg skal vera samkvæmt ákvæðum samþykktar þessarar, laga nr. 7/1998 um hollustuhætti og mengunarvarnir, laga nr. 55/2003 um meðhöndlun úrgangs og reglugerðar nr. 737/2003 um meðhöndlun úrgangs.

Reykjavíkurborg sér um söfnun á heimilisúrgangi frá íbúðarhúsum í Reykjavík og hefur umsjón með rekstri grenndarstöðva fyrir flokkaðan heimilisúrgang. Heilbrigðisnefnd er heimilt að veita öðrum aðilum tímabundna undanþágu til söfnunar á flokkuðum heimilisúrgangi frá íbúðarhúsum í Reykjavík. Skilyrði undanþágu er að þjónusta sem veitt er sé meiri en þjónusta sem Reykjavíkurborg veitir, þ.e. nái til söfnunar á fleiri úrgangsflokkum. Í undanþágu skal kveðið á um nánari skilyrði hennar.

Undanþáguhafi skal gefa Reykjavíkurborg og Heilbrigðisnefnd Reykjavíkur fullnægjandi skýrslu um magn úrgangs og flokkun hans, fjölda heimila, fjölda íláta, tíðni losunar og meðferð úrgangsins eða aðrar þær upplýsingar sem leyfishafi óskar auk almennra hollustu- og mengunarvarnaákvæða, á því formi sem gerð er krafa um og samkvæmt fyrir mælum um framsetningu. Undanþáguhafi skal veita Reykjavíkurborg og Heilbrigðisnefnd Reykjavíkur gögn til staðfestingar á meðhöndlun úrgangsins, sé þess óskað. Undanþáguhafi skal veita upplýsingar að eigin frumkvæði fyrir 1. mars ár hvert. Sinni undanþáguhafi ekki þeim skyldum sem á hann eru lagðar er Heilbrigðisnefnd heimilt að fella undanþágu um söfnun á flokkuðum heimilisúrgangi í Reykjavík úr gildi að undangenginni viðvörun. Undanþágu skal aðeins veita þeim sem hefur starfsleyfi til endurvinnslu og flutnings úrgangs í Reykjavík.

Rekstraraðilar sem úrgangur fellur til hjá skulu sjálfir sjá um söfnun og meðferð á þeim úrgangi sem fellur til við reksturinn. Rekstraraðilar skulu fylgja kröfum sem gerðar eru um flokkun tiltekinna úrgangsflokka frá blönduðum úrgangi, sbr. 5. gr. samþykktar þessarar og eftir því sem við á kröfum um sorpgerði og -geymslur sbr. 6. gr. og kröfum um djúpgáma sbr. 7. gr.

Heilbrigðisnefnd Reykjavíkur hefur eftirlit með meðhöndlun úrgangs í Reykjavík skv. 2. mgr. 4. gr. laga um meðhöndlun úrgangs nr. 55/2003 með síðari breytingum og 4. mgr. 4. gr. reglugerðar nr. 737/2003 um meðhöndlun úrgangs með síðari breytingum og að farið sé að samþykkt þessari.

3. gr.

Umgengni á lóðum og lendum

Óheimilt er að skilja eftir eða geyma garðaúrgang eða annan úrgang á víðavangi, götum eða gangstéttum. Sama á við um númerslausar bifreiðar, bíflök, vélar og sambærilega hluti.

4. gr.

Söfnun á heimilisúrgangi

Sérhverjum húsráðanda íbúðarhúsnæðis er skylt að nota þau ílát og þær aðferðir sem Heilbrigðisnefnd Reykjavíkur ákveður. Ílát fyrir blandaðan heimilisúrgang skal losa að jafnaði á 14 daga fresti. Ílát fyrir pappírs- og pappauúrgang og ílát fyrir plast skal losa að jafnaði á 21 dags fresti. Heilbrigðisnefnd getur heimilað aðra hirðutíðni, s.s. í dreifbýli eða á Kjalarnesi svo gæta megi hagkvæmni við hirðu. Umhverfis- og skipulagssvið í samráði við Heilbrigðisnefnd Reykjavíkur útbýr leiðbeiningar um fyrirkomulag, fjölda, aðgengi og staðsetningu íláta undir úrgang frá heimilum.

Heimilt er að óska eftir að heimilisúrgangur sé hirtur í gámum á yfirborði eða niðurgröfnum sem losaðir eru með krana sbr. 7. gr. Húsráðendur geta valið hirðutíðni gámana en skal losun þeirra ekki vera örari en 7 daga fresti að jafnaði og skal blandaður úrgangur ekki hirtur sjaldnar en á 21 dags fresti að jafnaði. Hirðutíðni gáma önnur en sú sem tilgreind er í 1. mgr. skal þó ávallt háð samþykki Heilbrigðiseftirlits Reykjavíkur.

Reykjavíkurborg útvegar ílát, önnur en gáma, til notkunar við íbúðarhúsnæði og eru ílátin yfirleitt 240 l plastílát. Húsráðendur sérbýlishúsa getað óskað eftir plastílati sem er 120 l, svokölluð spartunna. Reykjavíkurborg getur þó, ef aðstæður leyfa, heimilað spartunnu við önnur hús en sérbýlishús. Þar sem stærri ílát henta við fjölbýlishús getur Reykjavíkurborg ákveðið notkun þeirra. Ílátin eru eign Reykjavíkurborgar og sér borgin um viðhald á þeim. Íbúðareigendur skulu gæta þess að valda ekki skemmdum á ílátunum. Verði ílát fyrir skemmdum af öðrum ástæðum en eðlilegri notkun og sliti getur Reykjavíkurborg farið fram á að íbúðareigandi greiði fyrir nýtt ílát.

Íbúðareigendur skulu halda ílátum hreinum svo ekki skapist heilsuspillandi aðstæður eða óþægindi af völdum þeirra. Haldi íbúðareigendur ílátum ekki hreinum getur Reykjavíkurborg látið hreinsa ílátin á kostnað íbúðareigenda.

Húsráðandi, hússtjórn fjöleignarhúsa eða meirihluti eigenda í fjöleignarhúsum geta beðið um að ílátum sé fjölgað eða fækkað og greiðir þá viðkomandi fyrir flutning íláta samkvæmt reikningi. Fjöldi íláta skal ekki vera svo takmarkaður að þau yfirfyllist. Að lágmarki skal vera eitt ílát fyrir blandaðan úrgang við hvert íbúðarhús.

Gæta skal þess að fylla ekki ílátin meira en svo að auðveldlega megi loka þeim, flytja og tæma. Tilfallandi umframúrgang sem ekki rúmast í ílati skal losa í sérmerкта poka sem bera hirðugjald, á grenndarstöðvar eða á endurvinnslustöðvar eftir því hvaða úrgangsflokk er um að ræða. Reykjavíkurborg skal sjá til þess að pokar sem bera hirðugjald séu seldir á aðgengilegum stöðum.

Í dreifbýli er Reykjavíkurborg heimilt í samráði við Heilbrigðisnefnd að setja upp ílát undir úrgang í alfaraleið í stað þess að sækja heimilisúrgang á hvert heimili. Staðsetning íláta skal vera þannig að aðgengi að þeim sé gott. Í ílátin má eingöngu setja heimilisúrgang.

Ganga skal þannig frá úrgangi að ekki stafi af honum hætta fyrir starfsfólk sem sinnir hirðu eða annarri meðhöndlun úrgangs, t.d. pakka inn glerbrotum og hvössum málmhlutum.

5. gr.

Flokkun úrgangs.

Íbúum og lögaðilum er skylt að flokka og endurnota eða endurnýta eins og kostur er. Ákvæði þessarar greinar gilda jafnt fyrir báða aðila.

Óheimilt er að setja eftirfarandi úrgangsflokka í ílát og poka fyrir blandaðan úrgang. Úrganginn skal setja í ílát söfnunaraðila sem sérstaklega eru ætluð fyrir viðkomandi úrgangsflokka eða skila til söfnunar- eða móttökuaðila sem hefur leyfi til móttöku á viðkomandi úrgangsflokki:

- Spilliefni, lyf eða annar hættulegur úrgangur.
- Timbur, brotamálmur, múrbrot og annar grófur úrgangur.
- Garðaúrgangur, jarðefni og grjót.
- Pappír og pappi s.s. dagblöð og tímarit, auglýsingapóstur, prent- og ljósritunarpappír, fernur, eggjabakkar og aðrar pakningar utan af matvælum og öðrum varningi hvort sem er úr sléttum pappa eða bylgjupappa s.s. morgunkornspakkar, pítsukassar og pappakassar.
- Skilagjaldsskyldar drykkjarvöruumbúðir úr áli, plasti, gleri og stáli.

6. gr.

Sorpgeymslur og -gerði.

Ganga skal þannig frá ílátum, sorpgeymslum og -gerðum að ekki valdi óþrifnaðium eða óþægindum. Halda skal þeim við eftir þörfum og þau hreinsuð reglulega. Sorpgeymslur og -gerði má eingöngu nota til geymslu úrgangs.

Sorpgeymslur og -gerði við íbúðarhús skulu vera á jarðhæð og standa sem næst aðkomu að lóð eða ekki lengra en 15 m frá lóðarmörkum þar sem því verður komið við. Af ílátum undir úrgang sem draga þarf lengra en 15 metra frá sorpgeymslu eða -gerði að hirðubíl til losunar skal greiða viðbótarlosunargjald skv. gjaldskrá fyrir meðhöndlun úrgangs í Reykjavík. Þar sem fleiri en eitt ílát eru við hús skulu ílát sem ætluð eru sama úrgangsflokki geymd á einum stað en ekki dreift um lóð.

Við hönnun á nýjum sorpgeymslum/-gerðum eða breytingar á eldri geymslum/gerðum, skal rými fyrir sorpílát miðast við að öllum heimilisúrgangi, blönduðum og flokkuðum, sé safnað við heimili.

Halda skal greiðfærri leið að ílátum undir úrgang og hreinsa burt snjó á vetrum. Þegar hundur er tjóðraður á lóð eða laus á lóð innan hundheldrar girðingar skal tryggja að komast megi óhindrað að ílátum til losunar.

Séu sorpgeymslur eða -gerði læstar skal notast við lykklakerfi Reykjavíkurborgar. Þar sem fara þarf um lokuð hlið eða hurðir getur Reykjavíkurborg farið fram á að til staðar sé búnaður, t.d. krækjur, til að halda hurðum og hliðum opnum meðan losun fer fram.

Aðkomuleiðir að ílátum undir úrgang skulu, eftir því sem kostur er, vera upplýstar og

upphitaðar svo ekki skapist hætta fyrir starfsfólk við losun ílátanna.

Óheimilt er að staðsetja ílát undir úrgang sem eru þyngri en 40 kg þannig að fara þarf með þau um tröppur eða mikinn hæðarmun á lóð. Þar sem fara þarf með ílát um tröppur skulu vera á þeim fastar sliskjur eða rampi sem draga má ílátin eftir. Gangbraut milli sliskja skal vera u.þ.b. 35 sm breið og breidd hverrar sliskju minnst 20 sm.

Ef frágangur sorpgeymsla og -gerða er ekki í samræmi við samþykta uppdrætti er heimilt að synja um losun íláts þangað til úrbætur hafa verið gerðar til samræmis við uppdrætti. Þinglýstum eiganda fasteignar skal gert viðvart og skorað á hann að bæta þar úr. Sama gildir um óviðunandi aðgengi eða frágang á sorpgeymslu eða -gerði sem gerir hirðu úrgangs erfiðleikum háð.

Að öðru leyti er vísað til byggingarreglugerðar nr. 112/2012 og reglugerðar nr. 737/2003 um meðhöndlun úrgangs.

7. gr.

Gámar á yfirborði og djúpgámar

Hægt er að óska eftir að heimilisúrgangur sé hirtur í gámum á yfirborði eða niðurgröfnum gámum, svokölluðum djúpgámum, sem losaðir eru með krana. Um skilgreiningu á gámum, hvort sem er á yfirborði eða djúpgámum, fer eftir staðlinum IST EN 13071 og skulu gámarnir uppfylla ákvæði staðalsins. Afla skal samþykkis sorphirðu Reykjavíkurborgar við val á gámum, fjölda þeirra og staðsetningu.

Kaup, rekstur og framkvæmdir við gerð og frágang í kringum gáma og djúpgáma, hvort sem er kassi, gámur, lúga eða annar tengdur búnaður, skal vera á kostnað og ábyrgð lóðarhafa. Gámar skulu rúma það magn úrgangs sem til fellur frá fasteigninni. Við ákvörðun fjölda gáma skal fara eftir viðeigandi ákvæði laga nr. 55/2003 um meðhöndlun úrgangs sem tilgreinir fjölda úrgangsflokka sem safna skal við heimili. Taka skal tillit til þyngdar viðkomandi úrgangsflokks við val á stærð og staðsetningu gáma.

Gámar skulu vera staðsettir á lóð viðkomandi fasteignar. Í undantekningartilfellum þar sem sýnt er fram á, með sérstökum rökstuðningi, að ekki sé unnt að staðsetja djúpgáma á lóð viðkomandi fasteignar er heimilt að staðsetja djúpgáma á sérstakri lóð sem er í tengslum við þá lóð sem fasteignin stendur á. Ætíð skal vera sami eigandi á lóð undir djúpgáma og eiganda lóðar.

Lóðarhafi ber ábyrgð á rekstri gáma, hreinsun og umgengni um lóðina og nánasta umhverfi hennar eins og um annarskonar sorpgeymslu sé að ræða. Reykjavíkurborg áskilur sér rétt að hreinsa lóðina á kostnað eiganda sé talin ástæða til þess, sbr. 4. mgr. 16. gr. reglugerðar nr. 737/2003 um meðhöndlun úrgangs, með síðari breytingum.

Við ákvörðun fjarlægðar gáma frá inngangi fasteignar skal miða við viðeigandi ákvæði byggingarreglugerðar. Gámar skulu vera í samræmi við gildandi skipulagsáætlanir fyrir viðkomandi svæði.

Að öðru leyti gildir 2. gr. samþykktar þessarar eftir því sem við á.

8. gr.
Grenndarstöðvar

Reykjavíkurborg rekur kerfi grenndarstöðva fyrir flokkaðan úrgang.

Á grenndarstöðvum skal tekið á móti flokkuðum úrgangi til endurnýtingar. Grenndarstöðvar skulu vera aðgengilegir öllum borgarbúum. Stöðvarnar skulu staðsettar á áberandi stöðum, þar sem íbúar og gestir borgarinnar eiga erindi og þar sem aðgengi er gott hvort sem er gangandi, hjólandi eða akandi. Þéttleiki grenndarstöðva skal vera þannig að að jafnaði verði ekki meira en 1 km fyrir íbúa að grenndarstöð. Þurfi að leggja niður grenndarstöð skal finna henni annan stað áður en starfsemi hennar er lögð niður.

Heilbrigðisnefnd Reykjavíkur ákveður hvaða flokkum úrgangs skal tekið við á grenndarstöðvum að fenginni tillögu Reykjavíkurborgar.

Óheimilt er að losa annan úrgang á grenndarstöð en þá flokka úrgangs sem tilgreindir eru með merkingum á hverri grenndarstöð.

9. gr.
Endurvinnslustöðvar

SORPA bs. sér um rekstur endurvinnslustöðva í Reykjavík. Þéttleiki endurvinnslustöðva skal vera þannig að að jafnaði verði ekki meira en 4 km fyrir íbúa að endurvinnslustöð. Þar sem því er ekki komið við er heimilt að fjölga þeim úrgangsflokkum sem tekið er við á eða við grenndarstöðvar í nágrenninu.

10. gr.
Gjaldtaka

Innheimta skal gjald fyrir meðhöndlun úrgangs í samræmi við ákvæði 23. gr. laga nr. 55/2003 um meðhöndlun úrgangs.

Gjöld skulu ákvörðuð og innheimt samkvæmt gjaldskrá sem sett er samkvæmt ákvæði 23. gr. laga nr. 55/2003 um meðhöndlun úrgangs og að fenginni umsögn Heilbrigðisnefndar, sbr. einnig 25. gr. laga nr. 7/1998 um hollustuhætti og mengunarvarnir. Sveitarfélagið skal láta birta gjaldskrána í B-deild Stjórnartíðinda. Gjöldin skulu vera sem næst meðalraunkostnaði við þá þjónustu sem veitt er og skal mengunarbótareglan vera höfð til hliðsjónar við ákvörðun gjalddöku. Gjöld fyrir söfnun á heimilisúrgangi og rekstur grenndar- og endurvinnslustöðva innheimtist með fasteignagjöldum á sömu gjalddögum.

Gjald fyrir heimilisúrgang skal miðast við fjölda og stærð íláta, tegund úrgangs, hreinsunartíðni og vegalengd sem draga þarf ílát við losun. Sé þessu breytt breytist gjaldið miðað við hluta úr ári reiknað í vikum. Reykjavíkurborg annast skráningu íláta og skiptingu gjalds á eigendur.

Í fjöleignarhúsum er gjöldum fyrir meðhöndlun úrgangs skipt eftir hlutfallstölum eigenda í

viðkomandi sameign sbr. 43. og 45. gr. laga um fjöleignarhús nr. 26/1994. Útreikningur hlutfallstölu skal byggður á flatarmáli eignarhluta hvers eiganda.

Reykjavíkurborg er heimilt að veita öryrkjum og eldri borgurum undanþágu frá ákvæði 2. mgr. 6. gr., um viðbótarlosunargjald, þegar sérstakar aðstæður krefja.

Gjald fyrir rekstur grenndar- og endurvinnslustöðva er lagt á allar fasteignir að undanskildu atvinnuhúsnæði í Reykjavík.

Til tryggingar greiðslu skv. gjaldskrá í 2. mgr. er lögveðréttur í viðkomandi fasteign í tvö ár eftir gjalddaga.

11. gr.
Refsiviðurlög

Með brot á samþykkt þessari skal farið skv. ákvæðum laga nr. 7/1998 um hollustuhætti og mengunarvarnir og 68. gr. laga nr. 55/2003 um meðhöndlun úrgangs.

12. gr.
Gildistaka

Samþykkt þessi er samþykkt af borgarstjórn Reykjavíkurborgar og staðfestist hér með samkvæmt ákvæðum 2. mgr. 8. gr. laga nr. 55/2003 um meðhöndlun úrgangs, sbr. 3. mgr. ákvæði 25. gr. laga nr. 7/1998 um hollustuhætti og mengunarvarnir, til þess að öðlast þegar gildi. Frá sama tíma fellur úr gildi samþykkt nr. 228/2013 um meðhöndlun úrgangs í Reykjavíkurborg.

Umhverfis- og auðlindaráðuneytinu, XXX 2016.

F. h. r.

X

Greinargerð með breytingum á samþykkt um meðhöndlun úrgangs í Reykjavík nr. 228/2013

Vegna breytinga á hirðutíðni og söfnun á flokkuðum og blönduðum heimilisúrgangi frá íbúðarhúsum í Reykjavík er þörf á endurskoðun samþykktar um meðhöndlun úrgangs í Reykjavík. Í drögum að endurskoðaðri samþykkt er jafnframt bætt inn nýrri grein varðandi hirðu á sorpgámum á yfirborði og niðurgrofnum en búast má við að fyrstu gámar til hirðu á úrgangi við heimili verði teknir í notkun á næsta ári. Kröfur um flokkun tiltekinna úrgangsflokka frá blönduðum úrgangi sem gerðar eru til íbúa eru nú einnig gerðar til lögaðila og skerpt er á ákvæðum varðandi sorpgeymslur. Helstu breytingar á einstaka greinum eru eftirfarandi.

1. gr., markmiðsákvæði

Greinin er ný. Markmiðsákvæði er bætt við samþykktina til að skýra markmið samþykktarinnar og úrgangsstjórnunar í Reykjavík.

2. gr., almenn ákvæði

Greinin er 1. gr. gildandi samþykktar. Skerpt er á skýrslugjöf undanþáguhafa um magn og meðhöndlun úrgangs sem safnað er frá íbúðarhúsum í Reykjavík. Kröfur um upplýsingar sem undanþáguhafar skulu veita, m.a. um magn úrgangs, flokkun, tíðni losunar og meðferð úrgangs eru óbreyttar en auk þeirra skal nú skila upplýsingum um fjölda heimila sem þjónustuð eru og fjölda íláta. Illa hefur gengið að fá upplýsingar frá undanþáguhöfum en í endurskoðaðri samþykkt er gerð krafa um að undanþáguhafar skili upplýsingum að eigin frumkvæði fyrir 1. mars ár hvert og hefur heilbrigðisnefnd heimild til að afturkalla leyfi þeirra sem ekki sinna skyldum að undangenginni viðvörun.

Í 4. mgr. sem er 3. mgr. 1. gr. gildandi samþykktar er bætt við setningu um að rekstraraðilar skulu fylgja kröfum sem gerðar eru um flokkun tiltekinna úrgangsflokka, sbr. 5. gr. samþykktarinnar og eftir því sem við á kröfum um sorpgeymslur og -gerði og djúpgáma.

3. gr., umgengni á lóðum og lendum

Greinin er 5. mgr. 1. gr. í gildandi samþykkt en er dregin fram sem sér grein til að skerpa á henni.

4. gr. söfnun á heimilisúrgangi

Hirðutíðni við hirðu á blönduðu sorpi er breytt úr 10 dögum í 14 og hirðu á flokkuðum endurvinnsluefnum, pappír og pappa og plasti úr 20 dögum í 21. Bætt er við nýrri setningu um að heilbrigðisnefnd geti heimilað aðra hirðutíðni, s.s. í dreifbýli eða á Kjalarnesi svo gæta megi hagkvæmni við hirðu. Einnig er bætt við setningu um að Umhverfis- og skipulagssvið í samráði við heilbrigðisnefnd útbúi leiðbeiningar um fyrirkomulag, fjölda, aðgengi og staðsetningu sorpláta við heimili.

Önnur málsgrein, sem varðar hirðu á úrgangi frá heimilum með gámum er ný og kveður á um hirðutíðni gáma.



5. gr. flokkun úrgangs

Greinin var áður 3. gr. samþykktar um meðhöndlun úrgangs í Reykjavík. Kröfur til flokkunar eru óbreyttar, þ.e.a.s. hvað skuli flokka frá blönduðu úrgangi, en þær eru nú einnig gerðar til lögaðila, ekki eingöngu íbúa. Talið er eðlilegt að gera sömu kröfu til lögaðila um flokkun endurvinnslufna frá blönduðum úrgangi en samkvæmt 8. gr. laga um meðhöndlun úrgangs nr. 55/2003 skal sveitarstjórn ákveða fyrirkomulag söfnunar á heimilis- og rekstrarúrgangi í sveitarfélaginu. Samkvæmt annari málsgrein sömu greinar setur sveitarstjórn sérstaka samþykkt um meðhöndlun úrgangs í sveitarfélaginu og er heimilt í slíkri samþykkt að kveða á um skyldu einstaklinga og lögaðila til að flokka úrgang. Greiningar Sorpu á samsetningu blandaðs úrgangs til urðunar frá rekstraraðilum sýna að pappír og pappi er um 20% af úrganginum samanborið við um 10% frá íbúðarhúsum.

6. gr. sorpgeymslur og -gerði

Þriðja málsgrein greinarinnar er ný. Gerð er krafa um að við hönnun á nýjum sorpgeymslum eða breytingum á eldri við íbúðarhús skuli rými fyrir ílát miðast við að öllum heimilisúrgangi sé safnað við heimili. Er þetta gert til að tryggja að nægt rými sé fyrir sorpílát þó svo íbúðareigandi kjósi að skila endurvinnslufnum á grenndar- og/eða endurvinnslustöðvar.

7. gr. gámar á yfirborði og djúpgámar

Greinin er ný. Nú er boðið uppá söfnun á heimilisúrgangi frá íbúðarhúsum með gámum í stað tunna eða kerja. Greininni er bætt við samþykktina til að skilgreina og skýra kröfur sem gerðar eru til þessara gáma, frágangs þeirra og reksturs.

8. gr. grenndarstöðvar

Er 5. gr. í gildandi samþykkt. Greinin er óbreytt fyrir utan viðbótar setningu í enda 2. mgr. um að ef leggja þurfi niður grenndarstöð skuli finna henni nýjan staða áður en hún er lögð niður. Er það gert til að viðhalda þéttleika og þjónustustigi grenndarstöðva.

9. gr. endurvinnslustöðvar

Er 6. gr. í gildandi samþykkt. Við greinina er bætt ákvæði um að þéttleiki endurvinnslustöðva í Reykjavík skuli vera þannig að ekki sé lengra en 4 km að næstu stöð en þar sem því verði ekki við komið sé heimilt að fjölga úrgangsflokkum á grenndarstöðvum í nágrenninu. Fjarlægðarmörkin eru í samræmi við þjónustusamning Reykjavíkurborgar og Sorpu um rekstur endurvinnslustöðva.

Aðrar greinar eru óbreyttar.

Guðmundur B. Friðriksson
Skrifstofustjóri skrifstofu umhverfisgæða

Heilbrigðisnefnd

Ár 2016, mánudaginn 22. febrúar kl. 10:35 var haldinn 99. fundur heilbrigðisnefndar Reykjavíkur í fundarsal Hofi. 7. hæð, austur að Borgartúni 12-14. Fundinn sátu Diljá Ámundadóttir, René Biasone, Sveinn Hjörtur Guðfinsson, Björn Birgir Þorláksson, Ólafur Jónsson og Jódís Bjarnadóttir.

Enn fremur sátu fundinn Árný Sigurðardóttir, Óskar Í. Sigurðsson, Guðmundur B. Friðriksson og Rósa Magnúsdóttir.

Fundarritari var Björgvin Rafn Sigurðarson.

Þetta gerðist:

1. Lögð fram breytingartillaga Ólafs Jónssonar, fulltrúa Samtaka Atvinnulífsins á 5. gr. í endurskoðaðri samþykkt um meðhöndlun úrgangs í Reykjavík. Breytt ákvæði hljómi svo:

„Íbúum og lögaðilum er skylt að flokka og endurnota eða endurnýta eins og kostur er.

Íbúum er óheimilt að setja eftirfarandi úrgangsflokka í ílát og poka fyrir blandaðan úrgang. Úrganginn skal setja í ílát söfnunaraðila sem sérstaklega eru ætluð fyrir viðkomandi úrgangsflokka eða skila til söfnunar- eða móttökuadila sem hefur leyfi til móttöku á viðkomandi úrgangsflokki:

- *Spilliefni, lyf eða annan hættulegan úrgang*
- *Timbur, brotamálm, múrbrot og annan grófan úrgang*
- *Garðaúrgang, jarðefni og grjóti*
- *Pappír og pappa s.s. dagblöð og tímarit, auglýsingapóst, prent- og ljósritunarpappír, fernur, eggjabakka og aðrar pakkningar utan af matvælum og öðrum varningi hvort sem er úr sléttum pappa eða bylgjupappa s.s. morgunkornspakka, pitsukassa og pappakassa*
- *Skilagjaldsskyldar drykkjarvöruumbúðir úr áli, plasti, gleri og stáli“*

Tillagan er felld með þremur atkvæðum fulltrúa Bjartrar framtíðar Diljár Ámundadóttur, fulltrúa Samfylkingarinnar Jódísar Bjarnadóttur og fulltrúa Vinstri Grænna René Biasone. Fulltrúa Samtaka Atvinnulífsins Ólafs Jónssonar greiddi atkvæði með tillögunni. Fulltrúi Pírata Björn Birgir Þorláksson situr hjá við afgreiðsluna.

2. Lögð fram á ný endurskoðuð samþykkt um meðhöndlun úrgangs í Reykjavík ásamt greinargerð dags. 19. febrúar 2016.

Endurskoðuð samþykkt um meðhöndlun úrgangs í Reykjavík er samþykkt með þremur atkvæðum fulltrúa Bjartrar framtíðar Diljár Ámundadóttur, fulltrúa Samfylkingarinnar Jódísar Bjarnadóttur og fulltrúa Vinstri Grænna René Biasone. Fulltrúi Samtaka Atvinnulífsins Ólafs Jónssaonar greiddi atkvæði gegn samþykktinni. Fulltrúi Pírata Björn Birgir Þorláksson situr hjá við afgreiðsluna.

Fulltrúi Bjartrar framtíðar Diljá Ámundadóttir, fulltrúi Samfylkingarinnar Jódís Bjarnadóttir og fulltrúi Vinstri Grænna René Biasone bókuðu:


„Fulltrúar Bjartrar framtíðar, Samfylkingarinnar og Vinstri grænna Heilbrigðisnefndar í Reykjavík samþykkja endurskoðaða samþykkt um meðhöndlun úrgangs í Reykjavík. Meirihlutinn samþykkir að senda samþykktina áfram til Borgarstjórnar.


Fulltrúar leggja til að skrifstofustjóri Umhverfissgæða útfæri ramma og vinnureglur er varða hirðu til leiðbeiningar fyrir starfsfólk sorphirðu borgarinnar.“


Bryndís Skúladóttir og Björg Ásta Þóraðróttir tóku sæti á fundinum.


Visað til borgarstjórnar.


Fleira gerðist ekki og var fundi slitið kl. 11:51.


Diljá Ámundadóttir


Björn Birgir Þorláksson


René Biasone


Ólafur Jónsson


Jódís Bjarnadóttir